



## **COMUNICADO DI PRENSA**

**Fecha: 1 di oktober 2009**

**No.: 19-2009**

**Oranjestad** - Comision Bon Boluntad (CBB) den su reunion semanal di dialuna 28 di september y tambe den reunion di mesun dia di Cuerpo di Supervision, a haci un analisis preliminar di con e campaña electoral y dia di eleccion mes a bay. En general por bisa cu e campaña a conoce un ultimo siman bastante tranquil y dia di eleccion mes tabata muestra un ambiente relaha, cu un pueblo cu na un manera digno a haci uso di su derecho di voto pa elegi un parlamento nobo.

Un delegacion di CBB a haci uso di gran parti di dia pa observa e proceso di votacion na varios urna. Tur caminda tabata reina un ambiente tranquil y positivo, y CBB ta kere cu ta na su lugar pa felicita pueblo di Aruba pa e manera con a celebra e dia importante aki y tambe con despues di e resultado tabatin un aceptacion generaliza di esaki.

Pa loke ta e votacion mes, problema na algun urna mainta tempran por ta indicacion cu nos mester cuminsa pensa riba introduccion di votacion electronico na lugar di e sistema actual cu ta transparente, pero ta trese bastante tardanza cune. Otro detaye manera e problema cu e calidad di e potloodnan realmente no tabatin un motibo valido si den 60 aña nunca el a presenta.

Aunke en general tur cos a resulta bon, por ta un recomendacion pa dedica mas atencion na informacion na publico di antemano tocante e aspectonan cu mester tuma na cuenta ora di vota. Tambe ta recomendable pa percura pa bon comunicacion di tur e urnanan cu Hoofdstembureau, durante henter dia pero especialmente durante e trabao di conteo di voto.

Otro aspecto cu por mehora e proceso di votacion ta pa inverti mas den preparacion di tur persona voluntario cu ta forma e dirigencia di e urnanan. Tambe por laga cada urna mes traha un evaluacion di con nan a experimenta e dia di eleccion y reuni nan critica y sugerencia pa mehoracion.

Awor cu eleccion ta tras di lomba, y Aruba ta regresa na bida di tur dia, ta keda e tarea di kita tur material di propaganda for di lugarnan publico. Pa esaki ta haci un suplica na e diferente partidonan pa kita loke nan tin na material. Na DOW un suplica special pa no tolera cu pa simannan largo e recuerdonan di campaña keda dorna nos isla innecesariamente.

Secretariado di Comision di Bon Boluntad :

Tel. 582-1120 Ext. 34/41-Fax. 588-3200

E-mail [secretariat@arubachamber.com](mailto:secretariat@arubachamber.com)

Website: [www.arubachamber.com/ComisionBonBoluntad.htm](http://www.arubachamber.com/ComisionBonBoluntad.htm)



CBB ta desea por ultimo felicita e tres partidonan cu a logra pa tin representacion den parlamento.

Un palabra di aprecio grandi ta bay pa Cuerpo Policial cu a sa di actua corectamente a pesar di e presion grandi, y tambe na otro servicio gubernamental cu a hunga un papel den e proceso electoral. Tambe ta agradeci medionan di comunicacion pa mantene pueblo informa tocante vision y plannan di e diferente partidonan den e proceso electoral.

Finalmente, CBB su agradecimiento ta bay na presidente di Consejo Electoral pa e comunicacion abierto cu el a mantene cu CBB durante e proceso.

Atentamente,  
Na number di Comision Bon Boluntad,



Lydia Emerencia, Presidente